

SECONDA SESSIONE URDINARIA DI U 2019  
2EME SESSION ORDINAIRE DE 2019  
24 È 25 D'UTTROVI DI U 2019  
24 ET 25 OCTOBRE 2019

2019/02/086

**REPONSE DE M. SAVERIU LUCIANI**  
**A LA QUESTION DEPOSEE PAR M. PIERRE-JOSE FILIPPOTTI**  
**AU NOM DU GROUPE « CORSICA LIBERA »**

**OBJET : Irrigation Vallée de Grossa**

O Sgiò Presidente, car'amicu

A vostra dumanda entre in u saccone di tant'altre dumande à prò di u sviluppu agriculu. Siatene ringraziatu. Un passu in daretu per divvi chì mese fà presentavamu un pre prugettu in u Falasorma, per u Marzulinu è Luzipeu.

St'etima scorsa dinò, si trattava di travaglii fatti, in traccia di fassi o anc'à fà in Balagna, in u Nebbiu, in Fiumorbu, in u Pian' d' Afretu sin'à Bonifaziu.

Per contu nostru, aldilà di vistigà regione per regione, capite bè chì u scopu maestru ferma quellu di prupone un pianu d'accunciamentu glubbale, inseritu per u più in a prima è a seconda tappa di ciò ch'è n'amu battizzatu Acqua Nostra 2050, ch'è no vi presenteremu allocc'à u prossimu veranu.

Intantu, statevi puru tranquillu, ùn ci scurdemu di u Sartinese : a valle di Conca, in Grossa hè dinò una primura maiò.

Iè, ci hè vultutu vint'anni per fà ghjunghje l'acqua di u matrale di l'Ortolu (guasi 3 milioni di metri cubbi) in Tizzà, in u 2016.

Trè anni fà, amu inauguratu stu famosu retale di u pian' di Cauria, aghjustendu una stazione cù parechje pompe, una riserva di 1500 metri cubbi è guasi 18 chilometri di canalizzazione in 300, sin'à 100 per cert'antenne più chjuce.

Cù sti travaglii, sò più di 4 milioni investiti, senza parlà di a custruzione, da quì à pocu, di l'usina di prudduzzione d'acqua di u Rizzanese, in listessu rughjone, in u Rizzanese, più di 3 milioni, bugettu puntellatu da u PEI, per rimpiazzà una unità travechja ch'ùn pò più assicurà di manera chjara l'alimentazione di l'acqua puttabile à favore di e pupulazione di u Sartinese.

L'affare ùn hè cusì faciule ma vedite bè ch'e no femu sforzi maiò, è scegliimu à a bella megliu e priurità, riguardu à un bugettu ch'ùn si pò stinzà di più chè cusì.

Per turnà di modu precisu à a vostra primura, sappiate ch'è u so scopu di pudè ghjunghje in a valle di Conca, l'Offiziu hà digià avanzatu di 500 metri cù canalizzazione in 300, dà avvicinacci à menu di 5 chilometri da l'altru capu.

Oghje ghjornu, i servizii travaglianu nant'è una stesa di u retale idrolicu ver di u settore di Funtanedda – Bunifazinca – Periscia è Cantirossi.

D'un puntu di vista finanziariu è tennicu, seremu in capacità di dà l'acqua à un spaziu potenziale novu di 100 ettare à l'ingrossu sti dui anni à vene, cù un'alimentazione in gravitariu, per un bugettu stimativu d'un mezu milione d'euri.

U seguitu, dimmola franca, si puderà rializà da ch'è n'averemu i mezi finanziariii è e risorse umane in raportu cù a impurtanza di u cantieru, vogliu vene à di un'antra stazione di pumpaghju è una antr'riserva, senza cuntà parechji chilometri di canalizzazione.

Per cunclude, ùn abbandunemu manc'è pena l'agricultori di u sartinese o sippuru quelli di a piaghja di u Taravu induve l'offiziu cuntinueghja l'accunciamentu di u territoriu.

Per faccila corta, Grossa è a Valle di Conca facenu parte, in a so tappa conclusiva, di e nostre primure. Sò, dipoi un bellu pezzu, integrate in u Pianu Acqua Nostra 2050, è ne turneremu à parlane è ancu à cumunicà prestu nant'è stu sugettu di l'acqua, in ogni terzeru.

Eccu ciò ch'ellua m'era cuncessa di divvi stamane, sapendu ch'dopu à cent'anni è centu mesi, l'acqua volta sempre à i so paesi.

À ringraziavvi